

Ngoenzseng Nanzlumz

贵港市覃塘区蒙公镇高占小学三年级 Cinz Gengin/覃建钧

Muengh ha muengh, dauqdaej caj daengz ngoenzseng 9 bi gou lo, hix caj daengz ngoenz seizcou ndaej bae youzlangh lo. Miz bouxlawz youq ngoenz seizcou bae youzlangh seiz gvaq ngoenzseng ne? Gijneix gyoengq doengzhag cungj mbouj miz bouxlawz ginglig gvaq ba!

Ngoenzneix, nditrongh raeujrub, cingq dwg ngoenz ndei bae youzlangh ne. Dou daengx ranz vunz naengh ci, miz gangj miz riu dwk, bae daengz Dunghhuz Gunghyenz. Dahnaix daiq dou gyoengq lwnyeyz guh'angq, mwngz buet gou gyaep, riuahaha dwk, daihgya hanh lae hanh conh, gwnz naj cungj riunyumj. Seizgan gvaq ndaej caen vaiq, mbouj caengz roxnyinh gijmaz daengngoengz couh doek roengz

baihbya lo, mbwn fuemx roengzdaej lo. Daxboh daxmeh lienzmuengz dawz fan youzcej okdaej bu youq gwnz namhbingz, gou caj mbouj gib dwk dawz aen dangauh ngoenzseng okdaej, dahcej ganjgip diemj hwnj labcuk. Dahnuengx caeuq daegnuengx mbouj yungh iu cix doengzsing ciengq hwnjdaej: "Hoh mwngz ngoenzseng vaiqlag! Hoh mwngz ngoenzseng vaiqlag……" Ciepdkw daihgya cungj gaen dwk angq ciengq hwnjdaej lo. Gou laep hwnj lwgda, ndaw sim laeglemx siengj aen simnyienh ndeu, cingq yaek aeu boq labcuk seiz, sawqmwh, raq rumz ndeu ci gvaqdaej, bang gou dawz labcuk ci ndaep lo. Daxboh naeuz, yienzlaiz dabsau seizcou hix daej coengh gou gvaq

ngoenzseng ne! Daihgya dingq le cungj humx gou bekwngz hwnjdaej. Gou sim'angq dwk gat dangauh ngoenzseng, faen hawj daihgya gwn, gij yiengh daegnuengx dahnuengx caen ndeiri, song boux de aeu fwngz vaz dangauh gwn, ndaw bak nyaed rim dangauh, bongzbdwbd, gwnz naj gwnz gyaep lij nem miz dangauh ne, daihgya yawjraen lo, youh riuahaha hwnjdaej……Mehsimj sikhaek aeu soujgih ingj aen ciengzmienh angqyangz neix roengzdaej.

Gwn dangauh le, dou youh gwn aenmak. Doeklaeng, daihgya dawz labsab gip seuq beuj ndei, couh angqyangyang dwk naengh ci dauqma lo.

Baez ngoenzseng neix gig geiz-



leix, nahnauh yiedyied, angqangq yangzyangz, gou aeu dawz de sij roengzdaej, geiq haeuj ndaw sim bae.

(lauxsae son'gyauq: Cinz Cinhdonz 覃珍团)

Ganq Dahnuengxbiuj

上林县大丰镇中心学校四(2)班 Se Swhyenz/谢思妍

Dahnuengxbiuj gaenq ndaej song bi lai lo, gangjvah caengz bienz, gyoengq vunzhung dingq le, cungj mbouj rox de gangj gijmaz, ndeiri dangqmaz.

Miz ngoenz ndeu, mehguh bae haw cawx doxgaiq, heuh gou ganq dahnuengxbiuj. Gou couh caeuq dahnuengxbiuj caez guhcaemz. Mbouj yaep ndeu, dahnuengxbiuj naeuz: "Youznaij, youznaij……" Gijmaz? Gou cungj dingq mbouj rox, mbouj rox de naemj aeu gijmaz. Dahnuengxbiuj raen gou mbouj hawj de, vix gwnz daiz: "Youznaij, youznaij……" Gou yawj coh gwnz daiz, miz bingz cijvaiz ndeu. O, gou rox le, dwg cijvaiz. Gou dawz diuz guenj cap haeuj ndaw bingz, hawj dahnuengxbiuj gwn, dahnuengxbiuj mienh gwn mienh riu.

Gwn liux cijvaiz, dahnuengxbiuj youh naeuz: "Densin, Densin" Gou laihnaeuz dahnuengxbiuj aeu gwn bingj, couh dawz aen bingj hawj de, hoeng dahnuengxbiuj aeu fwngz faet deuz, ngauz gyaep naeuz: "Yawj densin, yawj densin." Gou saeqsim baez dingq, yienzlaiz dahnuengxbiuj aeu yawj densi ya. Yienghneix, gou couh hai densi hawj dahnuengxbiuj yawj.

Yawj ndaej yaep ndeu, dahnuengxbiuj youh naeuz: "Suiz……"



suiz……" Gou doeksaet yat, daj gwnz sahfaiz gingj roengzdaej, byawz……byawz cung haeujdaej lo? Yawjyawj mbouj miz vunz, sijsaeq ngeix cij rox dahnuengxbiuj aeu gwn raemx. Gwn raemx sat, nuengxbiuj youh naeuz: "Niu……niu……niu" Gou dingq hauilai nanz, hix dingq mbouj rox dahnuengxbiuj gangj gijmaz, dahnuengxbiuj simgip le daej hwnjdaej, buekmingh swenj hwnjdaej: "Niuniuj, niuniuj……" Baenz neix gou rox lo, dahnuengxbiuj aeu oknyouh, yienghneix, gou couh daiq dahnuengxbiuj bae haexgaeng oknyouh.

Ai, ganq lwnyeyz caen mbouj yungzheih ha.

(lauxsae son'gyauq: Vangz Gveiyangh/黄桂香)

Gij Doenghyiengh Beij Faensoq Lai Youqgaenj

Miz ngoenz ndeu, gou caeuq bouxdoengzdaiz doxceng lo.

Ngoenz haenx, miz ciengz gaujsi ndeu. Gaujsi seiz gou bungz diuz daez hoj ndeu, baenzlawz cungj guh mbouj ok. Gou laeglemx cam bouxdoengzdaiz: "Mwngz lwnh aen dapanq diuz daezmoeg neix hawj gou ndaej lwi?"

Bouxdoengzhag da caengz gou baez ndeu, lej sing naeuz: "Veij! Mwngz aeu ndiu di, neix dwg gaujsi bw!" Gou naemj guh ok diuz daez neix lai, neix le couh caegcaeg fan saw yawj, ra daengz aen dapanq diuz daez neix lo. Yienghneix, gou angqvau dwk cau hwnjbae. Aenvih gaujsi gaxgonq daxmeh naeuz gvaq, gou langh gauj ndaej daih'it, couh hawj gou cawx aen danci moq ndeu. Doeksat, gij saeh neix deng bouxdoengzdaiz gou yawjraen lo. Roengzdangz lo, de gienq gou bae "gag nyinhloek".

Gou hozhwnj fozfoz dwk caeuq de naeuz: "Gven mwngz maz saeh!" Daj seizhaenx le, gou couh guhyiengh caeuq de doxduenh bae, lai baez vit vwnzgi, dozveh de, roxnaeuz sik saw de. Hoeng de mbouj dawz haeujsim saek di, lij nanz mbouj nanz

daezsingj gou "aeu guh bizgi" "fan saw la" daengjdaengj.

Geij ngoenz le banringzgvaq, de caeuq gou gangj: "Mwngz ceiqrdei lij bae 'gag nyinhloek' ba! Gou gaenq dawz 'sah' mwngz lwnh lauxsae lo. Lauxsae naeuz mwngz langh bae 'gag nyinhloek', de couh yienzliengh mwngz lo."

Gou youh hozgig youh ndatheiq, simcingz mbouj onj dwk bae daengz ndaw bangunghsiz lauxsae, yieqq lauxsae nyinhloek lo, caemhcai baujingq gvaqlaeng itdingh mbouj baenzneix guh lo. Lauxsae hozraez vahnaek doiq gou naeuz: "Mwngz yieqq gou nyinhloek gou sim'angq dangqmaz……" Daj gij vah lauxsae ndawde, gou yawj ok lauxsae goxgonq mbouj rox gij saeh gou caeg yawj saw.

Bonjlaiz, bouxdoengzdaiz mbouj caeg gangj saeh laeglemx gou gvaq. Yienghneix le, gou ndawsim ngeix mbouj cingcuj couh vaiqvaiq yamq buet bae gyausiz, ra daengz bouxdoengzdaiz, cam de: "Mwngz vihmaz yaeuh gou?"

Bouxdoengzdaiz lejlej naeuz: "Gou cij hawj mwngz rox, gijmaz beij faensoq lai naek." (Lij Yinhyenz)

